


雲南通志



雲南通志



雲南通志卷之第十五

祠祀

附寺觀

聖王制祭祀考諸祭法可見雲雷風雨是謂天神山川社稷是謂地祇禦災捍患有功德於民者是謂人鬼非此族也不在祀典

國家事神治人一衷於禮所以昭誠敬正人心懷柔百神爲民祈福他如忠孝節義咸進而俎豆之亦獎勵名教之意也故酒醴牲牢載諸令甲有司行事者祀典紀之拊鼓安歌民間春祈秋報者羣祀紀之至浮圖老子之宮祝釐禮慶往往在是又况晨鐘暮鼓發

人深省平志祠祀寺觀附焉

雲南府

祀典

先農壇

在府城東門外 本朝雍正五年奉

旨建壇高二尺一寸方廣二丈五尺祠三楹左右齋房各

二左貯農具耜耨有為辨祭所耜田四畝九分

欽定日期督撫率司道各官致祭各府知府主之各州縣

知州知縣主之同城文武官員悉陪祭奏樂歌樂章

祭畢行耕耨禮通省府屬各州縣方位皆與府同其

分防之師北大關魯甸攸樂磬嘉維西中甸俱係經

管錢糧十二年布政使

陳弘謀詳明一體建造

社稷壇

在府城西門外明洪武元年令天下郡縣置社稷壇每歲春秋二仲月上戊日祭 本朝因之

通省府屬各州

縣皆與府同

風雲雷雨山川壇

在府城南門外明洪武元年令天下郡縣置山川壇六年定風雲雷雨及

境內山川城隍共一壇春秋二仲月上戊日祭
本朝因之通省府屬各州縣皆與府同

龍王廟

在府城西門內菜海子旁
本朝雍正六年奉

旨勅封福滇益農龍王
內府造像輦送至滇建祠以時致祭月吉瞻禮

關帝廟

在府城南門外
本朝雍正五年奉

旨勅封三代曾祖光昭公祖裕昌公父成忠公位於後殿
每歲春秋二仲月奉部定期督撫率司道以下官致祭
各府知府主之各州縣知州知縣主之同城文武官員悉陪祭

城隍廟

在府城西門內明洪武二年令有司祭城隍仍前代禮府封威靈公州封靈佑侯縣封顯佑伯

三年改今稱廟三楹中祀雲南省都城隍之神左祀雲南府城隍之神右祀昆明縣城隍之神
本朝因之

郡厲壇 在府城北門外明洪武二年令郡縣立厲壇每歲清明日孟秋望日孟冬朔日祭無祀鬼神在

府州曰郡厲在縣曰邑厲 本朝因之通省府屬各州縣皆與府同

旗纛廟 在府城內總督箭道後每歲春用驚蟄日祭秋用霜降日祭以督標中營副將主之撫標及各

營將官俱陪祭

史皇祠 在府學宮內受圖制字為書契祖本朝康熙五十八年奉文建

文昌宮 在府城大西門外有司以時致祭

天后宮 在府城南門外教場 本朝雍正十一年奉

旨每歲春秋二仲月督撫率司道以下官致祭

八蜡祠 在安良縣城西左衛營他州縣亦有

金馬山神祠 在府城東金馬山麓

碧雞山神祠

在府城西碧雞山麓

羊頭神廟

在府城南濱屬井鬼分野故祀鬼宿

諸葛武侯祠

在府城內五華山有司以時致祭

名宦祠

在府學宮內通省府屬各州縣皆與府同

鄉賢祠

在府學宮內通省府屬各州縣皆與府同

忠義孝弟祠

在府學宮內本朝雍正四年奉

旨建通省府屬各州

縣皆與府同

節孝祠

在府學宮外本朝雍正四年奉

旨建通省府屬各州

縣皆與府同

報功祠

在府城東重關內原建咸陽王廟祀元費典本朝寧王廟祀明沐英二廟俱在城南本朝康熙

熙三十年總督范承勳巡撫于繼文率司道各官改遷今地合為一祠春秋致祭易今名

定遠王廟

在報功祠東祀黔國公沐晟

崇德祠

在府城南祀明布政使張統巡按御史樊瑩巡撫都御史王恕顧應祥今廢

三忠祠

在府城南石虎崗舊名二忠祠祀明翰林學士王諱刑部尚書吳雲後燬於兵本朝康熙三

十年總督范承勳巡撫王繼文率司道各官改建於城東重關內合祀本朝總督甘文焜易今名

甘忠果公祠

在府城內本朝康熙五十五年建祀總督甘文焜

勅賜

御書勁節匾額

三賢祠

在府城東金馬祠左明巡撫陳用賓建祀漢諫議大夫王褒明僉事劉寅修撰楊慎

傅公祠

在府城南祀明初征南大將軍潁國公傅友德

太史祠

在府城西高曉村祀明修撰楊慎萬曆中布政使劉之龍建後重修後廢本朝康熙二十八

年總督范承勳
重建置田供祭

郭公祠
在府城北廣備倉祀明正
統間知府郭鎮俗呼倉神

董公祠
在府城東祀明弘
治間知府董復

羣祀

東嶽廟
在府城東

南嶽廟
在府城東南

中嶽廟
在府城南
雲津橋下

西嶽廟
在府城西

北嶽廟
在府城南
小澤口

晏公廟
在府城南二十
里臨滇池上

三聖廟

在府城小西門內祀三國漢昭烈帝關壯繆張桓侯

三義廟

在府城南門外教場左

火神廟

在府南門外教場在府北門外教場

龍王廟

一在府城西南羅漢山下一在府城東白龍潭一在府城北黑龍潭一在昆陽州北海門村牛

舌洲上明洪武末勅封惠濟龍王一在嵩明州西十五里嵩境田畝全資各處龍泉灌溉惟此龍泉利潤更溥明知州余化龍詳請以季春辰

日致祭若知州弗與祭輒多亢陽

五靈廟

在府城南門內祀唐葛周三真君及崇寧至道真君清源妙道真君合稱五靈按崇寧真君即

關壯繆清源真君即隋嘉州太守趙昱唐葛周三真君相傳為周厲王時三諫官棄官遊吳仙去者又有

三國漢鎮軍將軍趙雲亦

附祀於內為碧山土主

大靈廟

在府城內城隍廟東即土主廟神為摩訶迦羅蒙氏城隍時建其像乃蜀匠羅都道太所造有

天竺僧菩提巴坡以秘咒丹書納像中復以手中菩
提念珠一枚種之庭前成樹焉神屢著靈異滇人奉
爲土神村邑處處奉之獨
在官渡者靈異與府廟同

白馬廟

在府城西南擺渡村相
傳祀三國漢靖侯龐統

祠山廟

在府城南雲津橋北岸漢張渤曾
鑿江通水郡人利之立祠祀焉

王子淵祠

在府城東祀漢
諫議大夫王褒

文齊廟

在府城東祀漢益州太守文齊齊降集羣
夷光武徵爲鎮遠將軍道卒詔起祠祀之

張立道祠

在府城西元時立道官雲南
最久得土人心立祠祀之

彭令遺愛祠

在富民縣城東門內令名兆
達本朝康熙間任有惠政

忠烈廟

在晉寧州城西古土城內祀寧州刺史李毅
之女名秀以有守城功唐開元初賜廟額

姚岳廟

在晉寧州城西以拒戰
有功土人立廟以祀

孝節祠

在晉寧州城北關外
祀孝婦任氏久廢

七公祠

在呈貢縣城南門內祀明巡撫周嘉謨參議李
作舟知府彭憲通判許報國周令德知縣田一

井典史

尹相湯

報德祠

一在呈貢縣城東南舊歸化縣北祀明知縣夏
可漁一在呈貢縣安江村祀明知縣劉大縉

清濁福邦鹽泉神祠

在安寧州城
內善政坊

將軍廟

在安寧州城西羅青山世傳元將軍羅青
與二弟南征戰沒於此土人立廟以祀

馬夫人廟

在安寧城北門內夫人晉末嘉二年生於浙
江之景寧縣夫亡事姑至孝後以七月七日

白日飛昇明永樂間封護國夫人萬歷閒州守林喬
松素奉祀于家時天旱禱雨立應州人羣立廟祀之

豫章祠

在祿豐縣城內世傳兵變時顯
聖退兵故建祠祀之神名無考

貞節祠

在昆陽州城內由義
坊祀節婦洪氏楊氏

倉聖祠

在易門縣學宮後

祈穀廟

在易門縣城東正月二十八日祭

土主山神廟

在嵩明州城南嘉麗澤畔世傳有漁人於澤中忽聞兒啼聲網之得一石神而異之

負至山半重不可舉遂率衆建祠後黔國公沐天波赴京襲職道經此雲霧迷路禱之立霽爲請封號每

歲上元

日祭

蘭公祠

在嵩明州楊林驛南蘭公名茂號止庵元末明初人博學多文隱居樂道本朝康熙二十九年

編修李澄中典試雲南過其墓建祠以祀四十八年布政使李華之增修

曲靖府

祀典

先農壇

在府城東門外

社稷壇 在府城
西門外

風雲雷雨山川壇 在府城
東門外

龍王廟 在府城西南十里每歲季春辰
日有司致祭郡有水旱必禱

關帝廟 在府
城北

城隍廟 在府
城內

郡厲壇 在府城
北門外

旗纛廟 舊在府治內久圯今
祭於城外演武廳

史皇祠 在府城西
關義學內

文昌宮 在府城
東門內

五雷廟 在府城西勝峯山每歲驚蟄
日祭郡有水旱則率衆往禱

白蠟山神祠 在羅平州城北後有龍潭每歲三月上辰日祭

武侯祠 一在府治內 一在北門外

名宦祠 在府學宮內

鄉賢祠 在府學宮內

忠義孝弟祠 在府學宮內

節孝祠 在府學宮外

李元禮碑祠 在府城南三里見古蹟萬歷閒知縣李藻禱雨有應於春秋二仲日祭今祠廢碑存

烈婦祠 在府城西祀郡人陳蕃妻任氏祠廢碑存詳見列女

羣祀

東嶽廟 在府城內東南隅

土主廟

一在舊府治一在尋甸州城西十五里土主山
滇考云元大德中滇池有蛟化為婦以淫人遇

神僧趙御羅呪黑虎擒之即土主也
明沐英征麓川得神兵助歸而立廟

火神廟

在尋甸州城北門外

馬王廟

一在霑益州一在尋甸州

五靈廟

在馬龍州城南觀音橋右

土地祠

在陸涼州城南關內

英烈侯祠

在尋甸馬龍交界關索嶺上
本朝康熙五十二年地震傾圮五十六年總督蔣陳錫巡

撫甘國壁重修或云索三國漢關壯繆子從武侯征

南凡鑿山通道多賴其力其在尋甸者稱英烈侯在

江川者稱龍驤將軍黔中安莊衛亦有關索嶺而碑

誌又有忠順之號按蜀志稱壯繆與子平同被難於

臨沮子興嗣無所謂索也說者謂索即興也夷人呼

父為索關索者猶關父也又曰關索者關鎖也以其

音之譌而
附會之也

臨安府

祀典

先農壇

在府城東門外

社稷壇

在府城西門外

風雲雷雨山川壇

在府城南門外

龍王廟

一在府西北十二里仲春致祭一在通海秀山於仲春辰日祀之一在寧州城北呂公山一在

河西縣城南

關帝廟

在府城西

城隍廟

在府城東